

MOCIÓN DO GRUPO MUNICIPAL DE FERROL EN COMÚN PARA CONTROLAR A PROLIFERACIÓN DAS APOSTAS ON-LINE E CASAS DE APOSTAS E TOMAR MEDIDAS DE PREVENCIÓN ANTE A LUDOPATÍA

O Grupo Municipal Ferrol en Común, ao abeiro do disposto nos artigos 104 do Regulamento de organización, funcionamento e réxime xurídico das entidades locais, presenta no Pleno da Corporación Municipal a moción para controlar a proliferación das apostas on-line e casas de apostas e tomar medidas de prevención ante a ludopatía.

Exposición de motivos

Dende hai uns anos proliferan os anuncios en televisión, radio, prensa escrita ou redes sociais, de casas de apostas deportivas on-line. Casas de apostas que insiren a súa publicidade en eventos deportivos, especialmente nas retransmisións deportivas e que mesmo chegan a utilizar estrelas do fútbol para animar aos televidentes a que aposten. Un sistema de xogo moito máis aditivo, sen pausas, con bonos «de balde» de entrada, e sobre todo cun inmenso investimento en publicidade que representa xusto os valores contrarios ás formas máis pausadas e tradicionais de apostar, como a lotaría de Nadal, a quiniela ou os cupóns da ONCE.

Segundo os datos do GGR (Gross Gaming Revenue) presentados, no 2019 houbo un total de 1.367.300 xogadores e xogadoras activos, o que supón un aumento do 7,15% respecto ao ano anterior. As cantidades apostadas tamén medraron en 5 millóns de euros aproximadamente entre un ano e outro. Estas cantidades non só corresponden ás aportas deportivas, se non tamén ao póker, casino e bingos virtuais. Ao mesmo tempo, o sector do xogo gastou en publicidade e patrocinio cerca de 200 millóns de euros. En España hai máis de medio centenar de empresas con licenza no negocio on-line e presencial.

Cabe poñer de manifesto que segundo os datos recollidos no informe “análise do perfil do xogador”, elaborado pola Dirección Xeral de Ordenación do xogo, o 83,46% das persoas que apostan teñen idades compendidas entre os 18 e 45 anos, atopándose o maior volume entre os 25 e 35 anos e o maior crecemento entre os de 18 a 25 anos. Cifras máis que preocupantes.

O xogo patolóxico é un trastorno que figura entre as adiccións de tipo comportamental nas clasificacións médicas e psicolóxicas. Consiste na perda do control do comportamento en relación ao xogo que se caracteriza por ter graves consecuencias para as persoas como problemas académicos, laborais, económicos, sociais e/ou legais asociados ao xogo.

A clase traballadora, que ten dificultades para poder acceder a un traballo estable e digno, é tentada a arriscar as súas rendas gañadas en traballos precarios. Non é estraño que nos barrios e localidades onde menos renda hai, sexa onde as políticas neoliberais máis efectos negativos causen a través das casas de apostas. Estas afectan especialmente á mocidade, onde a falta de expectativas e dun futuro estable é o caldo de cultivo perfecto para ter doses rápidas de adrenalina e onde tentar conseguir diñeiro sen esforzo.

Tampouco é admisible que as casas de apostas aumenten día a día os seus beneficios e deixen ás familias e ao conxunto da sociedade a obrigaón de custear integramente o tratamento das persoas ás que engancharon. É de xustiza, por tanto, aumentar a contribución que os beneficios destas empresas teñen que facer ao conxunto da sociedade para que se poida tratar de maneira eficaz ás persoas adictas ao xogo e para que se poidan investigar eses mecanismos e previr futuras adiccións.

De forma física ou a través de Internet, o que se esconde detrás de cada aposta é o mesmo: fanche crer que non é necesario traballar para xerar riqueza, que podes investir o teu diñeiro e, se o fas ben, multiplicaralo. Este conto liberal obvia que o teu beneficio implica que alguén como ti está a perder o seu diñeiro, tamén obvia que un día gañaches pero ao seguinte podes perder moito máis. Non é cuestión de xeito que, en última instancia, sexa o dono da casa de apostas o único que gañe, é cuestión de matemáticas.

É o momento de que as diferentes institucións **adapten a normativa á realidade social, económica e tecnolóxica da actividade do xogo** antes de que se converta nunha secuela sen retorno.

Expoñemos nesta moción unha serie de medidas, a nivel municipal e supramunicipal, para atallar esta problemática. Por un lado, entendemos que é necesario prohibir a publicidade destes locais e frear a súa expansión a través das ordenanzas ou as normas urbanísticas, sendo tamén importantes as medidas de prevención ante a ludopatía. Por último, expoñemos unha serie de propostas a nivel fiscal para gravar a actividade das casas de apostas e do xogo on-line.

Polo anteriormente exposto, o grupo municipal Ferrol en Común somete a votación a presente moción e os seguintes acordos:

1) Instar ao Goberno do Estado a reformar a Lei Xeral da Comunicación Audiovisual e a Lei Xeral de Publicidade para que se regule a publicidade das Casas de Apostas e prohibíbase que estas empresas se poidan publicitar para facer efectiva a protección do público infantil e xuvenil, na mesma liña do Real Decreto de Comunicacións Comerciais das Actividades de Xogo recentemente entrado en vigor.

2) Instar ao Goberno do Estado a aumentar o tipo aplicable no Imposto sobre Actividades do Xogo para as casas de apostas e do xogo online.

3) Instar á Xunta de Galicia a que, igual que pasa co gremio de tabacaleiras ou farmacias, limite a apertura das casas de apostas físicas mediante o establecemento dun mínimo de metros de separación ou por núcleos de poboación, para frear así a súa expansión, con especial atención aos centros escolares, determinando un mínimo de distancia entre estes e as casas de apostas.

4) Instar á Xunta de Galicia a que prohiba as terminais de apostas deportivas en salóns de xogo, bingos, casinos e locais de restauración.

5) Instar ao Goberno Local á revisión e modificación das ordenanzas urbanísticas para incluír limitacións ao establecemento de casa de apostas nas inmediacións de espazos frecuentados pola infancia e mocidade, coma son os centros educativos, culturais, deportivos ou xuvenís, determinando para elo unha distancia mínima entre eles e os locais de xogo. Así coma incluír estas mesmas restrición no futuro PXOM.

6) Instar ao Goberno Local a que, a través da Ordenanza de Publicidade, regule a eliminación de calquera cartellaría do mobiliario urbano ou do espazo público deste tipo de establecementos, ceñíndose exclusivamente aos carteis do propio local incluíndo unicamente o nome e sen ningún tipo de publicidade.

7) Instar ao Goberno Local a que realice campañas e actividades informativas nos centros escolares para profundar no uso que fan os mozos e mozas dos xogos on-line e de apostas, así coma os posibles problemas derivados deste uso.

8) Instar ao Goberno Local a que reforce a formación da Policía Local de modo que se familiaricen coas infraccións máis habituais relacionadas coas apostas e o xogo, particularmente no acceso de menores de idade, persoas incapacitadas legais e persoas co acceso ao xogo legalmente restrinxido.

9) Instar ao Goberno Local a que solicite aos equipos deportivos locais e aos seus xogadores e xogadoras a colaborar para que non se identifique o deporte coas apostas, asumindo a súa responsabilidade social, eliminando a publicidade das casas de apostas, poñendo en marcha campañas de concienciación e non asinando convenios de colaboración, nin patrocinios a entidades deportivas que fagan publicidade das casas de apostas.

10) Instar ao Goberno Local a que cre unha taxa específica pola utilización privativa ou o aproveitamento especial do dominio público local, que teña que ser abonada polos establecementos que instalen pantallas ou outro tipo de dispositivos para desenvolver a súa actividade empresarial con fronte directa á vía pública ou en liña de fachada.

Ferrol, 18 de febreiro de 2022

Jorge Suárez Fernández

Voceiro do GM Ferrol en Común